

四庫全書

經部

欽定四庫全書

經部

易酌卷八

詳校官鴻臚寺少卿臣梁景陽

通政使司副使臣莫瞻菴覆勘

總校官檢討臣何思鈞

校對官中書臣葉蘭

謄錄監生臣張護

欽定四庫全書

易酌卷八

周易下經



乾上

姤女壯勿用取女

傳以一陰始生漸有盛長之勢為女壯本義以一陰  
當五陽為女壯本義較勝蓋一陰雖漸長未見其壯

祁州刁包撰

也惟出而當五陽則暴悍剛狠之意具見于此矣故  
曰女壯壯者男子之事非婦人之宜也觀家人一卦  
以女貞盡之女之不貞家道所繇敗也故曰勿用取  
女傳曰取女者欲其柔和順從以成家道姤乃方進  
之陰漸壯而敵陽者是以不可取也又曰姤雖一陰  
甚微然有漸壯之道所以戒也此春秋慮禍于微防  
患於早之意也

彖曰姤遇也柔遇剛也

一陽始生則幸之曰復復者固然之事也一陰始生則危之曰姤姤者卒然之遭也本義云姤遇也決盡則為純乾四月之卦至姤然後一陰可見而為五月之卦以其本非所望而卒然值之如不期而遇者故為遇遇已非正又一陰而遇五陽則女德不貞而壯之甚也其義更詳於傳此釋卦名也

勿用取女不可與長也

取女所以偕老為保家長久之計今一陰雖微已有

凌逼五陽之勢豈可長久乎故勿用取女也此釋卦辭也

天地相遇品物咸章也

以卦辭言之本是个不好的遇雖然以卦體言之天非地則不成地非天則不生天地相遇而品物有光輝發越之盛矣章即文章之章謂有文彩可著見也或曰姤者乾之末坤之始天地相遇象也以四時言之月至姤辰為午萬物相見乎離而蕃衍乎大夏品

物咸章象也

剛遇中正天下大行也

剛遇中正從來俱指二五本義獨指九五蓋以五中  
且正二中而非正也以陽剛之德遇中正之位故其  
道可以大行於天下也此釋卦才也

姤之時義大矣哉

姤之時義承上四句而贊之此例甚多本義獨云幾  
微之際聖人所謹專為一陰慮也大抵彖辭原是不

好的傳既釋之却又看出一段絕好道理來是孔子之易而非文王之易也傳辭原是極好的本義又看出一个不好消息來是朱子之易而非孔子之易也若必正釋彖辭則必以程傳為主傳曰天地不相遇則萬物不生君臣不相遇則政治不興聖賢不相遇則道德不亨事物不相遇則功用不成姤之時與義皆甚大也如此說大之義始無餘蘊

象曰天下有風姤后以施命誥四方



天之所以鼓舞萬物者風也風其天之誥命乎后之  
所以鼓舞萬民者誥命也誥命其后之風乎故后觀  
于天下有風之象而以施命誥四方也施象天命象  
巽誥四方象風行天下是上下所以相遇者也按詔  
誥之體三代尚矣後世遂故事視之或言是而行非  
或朝令而夕改奉天之謂何然漢唐間亦有誥辭懇  
篤而父老扶杖軍士投戈者其猶庶幾乎始之象乎  
傳曰諸象或稱先王或稱后或稱君子大人稱先王

者先王所以立法制建國作樂省方敕法閉闕育物  
享帝皆是也稱后者后王之所為也財成天下之道  
施命誥四方是也君子則上下之通稱大人者王公  
之通稱此義安可不知

初六繫于金柅貞吉有攸往見凶羸豕孚蹢躅

本義云繫於金柅小人自繫也看來還作君子繫之  
為是傳曰姤陰始生而將長之卦一陰生則長而漸  
盛陰長則陽消小人道長也制之當于其微而未盛

之時柅止車之物金為之堅強之至也止之以金柅而  
又繫之止之固也固止使不得進則陽剛貞正之道  
吉也其所以防之者至矣又曰使之進往則漸盛而  
害於陽是見凶也羸豕孚蹢躅聖人重為之戒言陰  
雖甚微不可忽也豕陰躁之物故以為況羸弱之豕  
雖未能強猛然其中心在乎蹢躅蹢躅跳擲也陰微  
而在下可謂羸矣然其中心常在乎消陽也君子小  
人異道小人雖微弱之時未嘗无害君子之心防

於微則無能為矣其所以慮之者深矣防之至慮之  
深則小人終為金柅所繫而不得肆其蹢躅之勢矣  
自古小人用事之始類似為無能為者及其權勢既  
成則束手而莫可誰何冠準之於丁謂是也使明於  
初六之義則小人終於羸豕而已

象曰繫於金柅柔道牽也

牽者挽拽之意即所謂繫也繫於金柅挽拽柔道使  
不得進也如此看似於牽意為切

九二包有魚无咎不利賓

傳意似未甚醒竊意初與四為正應四本初之主也  
初既比二而為其所乘則二為主四為賓矣魚陰美  
之物象小人包而有之者直裹之使不逸於外也制  
馭小人因為君子之害何咎之有然制馭之道利主  
不利賓何也主去初近賓去初遠也九二剛中身任  
制陰之責不委其事於四故曰不利賓

象曰包有魚義不及賓也

象提出義字蓋戢惡防奸義當為則為之若自己不  
做靠他人做則非義矣故賓在上而不相及也此與  
舊解全別

九三臀无膚其行次且厲无大咎

焦氏云姤之九三即夬之九四非也夬四宜進而從  
陽居不安行不進柔之象也故曰无大咎以剛居剛  
見一陰在下而不肯坐視臀无膚也欲制在下之陰  
而不得其道其行次且也與陰為敵常懷危厲之心

雖未能如二之无咎亦可以无大咎矣本義曰既无  
所遇則无陰邪之傷故雖危厲而无大咎也如此說  
更妥

象曰其行次且行未牽也

三之次且與夬四之次且同三之行與夬四之行實  
不同蓋其行也未能繫於金柅牽制柔道而亦未為  
柔道所牽制也兩牽字正同

九四包无魚起凶

四與初為正應初固四之有也今既過於二則失其  
所有矣故為包无魚之象傳曰四之失者不中正也  
以不中正而失其民所以凶也曰初之從二以比近  
也豈四之罪乎曰在四而言義當有咎不能保其下  
繇失道也豈有上不失道而下離者乎遇之道君臣  
民主夫婦朋友皆在焉四以中繫故主民而言為上  
而下離必有凶變起者將生之謂民心既離難將作  
矣此義甚透然則象雖言民凡為君臣夫婦朋友者



皆不可不知此義也

象曰无魚之凶遠民也

不曰民遠已而曰已遠民責有攸歸矣或曰象辭另發一意非也均是陰也以德言曰小人消陽者也不可近也以位言曰民從陽者也槩以為陰而遠之失却上下一體道理矣此學易者所以貴乎知變通也九五以杞包瓜含章有隕自天

傳作求賢說似晦本義曰瓜陰物之在下者甘美而

善潰杞高大堅實之木也五以陽剛中正主卦於上而下防始生必潰之陰其象如此然陰陽迭勝時運之常若能含晦章美靜以制之則可以回造化矣有隕自天本无而倏有之象也其義精矣余更有說焉詩云綿綿瓜瓞瓜之為物滋蔓不已象小人以甘美之資為援引之勢也杞高蔭大包者覆冒其上日不能暄雨露不能潤則瓜何以蔓此防閑小人之善道也含章者明足以燭而不露術足以用而不洩覆冒

之中寓有裁割之意也如是則瓜不蔓而自潰天墮之矣瓜墜落曰墮以陽消陰而無其迹疑非人力所為故曰有墮自天也如此解似通

象曰九五含章中正也有墮自天志不舍命也

英氣最害事五有中正之德故渾然不露圭角含章也命者所得於天之理也志不舍命處心積慮不敢踰越乎天理有墮自天其志一之動氣乎冥冥中有相之者矣

上九姤其角吝无咎

傳曰至剛而在最上者角也九以剛居正故以角為象人之相遇絲降屈以相從和順以相接故能合也上九高亢而剛極人誰與之以此求吝固可吝也此義甚精獨以无咎為无所歸咎恐未確竊意吝者无所遇也吝而無咎者无所遇而陰未能消陽也象曰姤其角上窮吝也

當姤之時憤世嫉俗甘心孤子窮於上而致吝也

䷁ 坤下  
兌上

萃亨王假有廟利見大人亨利貞用大牲吉利有攸往  
為卦兌上坤下兌為說說者情之聚也坤為衆衆者  
勢之聚也情與勢合所遇與聚矣故其卦為萃觀彖  
傳无亨字其為羨文无疑或尚着解非也假字訓至  
未盡當作感格意如詩秦假无言之格易王假有家  
為感格况王假有廟乎傳曰羣生至衆也而可一其  
歸仰人心莫知其鄉也而能致其誠敬鬼神之不可

度也而能致其來格天下萃合人心總攝衆志之道  
非一其至大莫過於宗廟故王者萃天下之道至於  
有廟則萃道之至也祭祀之報本於人心聖人制禮  
以成其德耳故豺獾能祭其性然也又曰天下之聚  
必得大人以治之人聚則亂物聚則爭事聚則紊非  
大人治之則萃所以致爭亂也萃以不正則人聚為  
苟合財聚為悖入安得亨乎故利貞如此始盡彖義  
用大牲吉承王假有廟來當萃之時百物豐備二簋

不可以用享故須用大牲始可以將假廟之誠稱假廟之典而吉也利有攸往承利見大人來見太人則事事皆亨物物皆正故往无不利也此王者受命而興合萬國之歡心以事先王之卦孝經云昔者周公郊祀后稷以配天宗祀文王於明堂以配上帝故四海之內各以職來助祭所謂用大牲吉而利有攸往者也

彖曰萃聚也順以說剛中而應故聚也

卦之所以為萃者以其聚也萃之所以為聚者以其  
順以說剛中而應也萃者下坤順上兌說順以說也  
此卦體也九五剛中而六二應之剛中而應也此卦  
德也君臣聚會和順而悅豫故於義為聚也

王假有廟致孝享也利見大人亨聚以正也用大牲吉  
利有攸往順天命也

王假有廟王者萃祖考之神以萃天下人之心所以  
極致孝享之誠致孝謂盡志致享謂盡物也傳曰萃



天下之心者无如孝享此語宜玩利見大人亨九五  
六二相聚以中正也傳曰見大人則其聚以正道得  
其正則亨矣萃不以正其能亨乎聚以正雖釋上句  
而釋利貞之意固在其中矣不言利貞省文也萃之  
時貴豐不貴儉用大牲吉所以對越天命也萃之時  
宜進不宜退利有攸往所以踐履天命也奉而不違  
故曰順順天命謂順天理也

觀其所聚而天地萬物之情可見矣

傳曰觀萃之理可以見天地萬物之情也天地之化育萬物之生成凡有者皆聚也有无動靜終始之理聚散而已本義曰極言其理而贊之天地萬物固無理外之情也徐氏曰天地萬物高下散殊咸則見其情之通恒則見其情之久萃則見其情之同不於其聚而觀之情之一者不可得而見矣說理頗精

象曰澤上於地萃君子以除戎器戒不虞

澤者水之聚地者澤之聚澤上於地萃之象也君子

觀其象而萃兵以萃民則有除戎器戒不虞之道焉  
國家雖安忘戰必危故戎禁亂之所繇生猶防止水  
之所自來也以舊防為元所用而去之者必有水敗  
以治戎為元所用而廢之者必有亂患蓋承平日久  
類有鈍兵朽甲之弊除者除其鈍朽而一新之也書  
曰善敎乃甲冑敎乃干備乃弓矢鍛乃戈矛礪乃鋒  
刃詩曰修爾車馬弓矢戎兵用戒戎作皆有備无患  
之道也秦平六國而銷鋒鏑晉平吳而撤武備不旋

踵而滅亡豈非忘不虞之戒乎師之大象曰地中有  
水師君子以容民畜衆萃之大象曰澤上於地萃君  
子以除戎器戒不虞二象大意畧同但彼以師之故  
而議萃此則以萃之故而議師耳

初六有孚不終乃亂乃萃若號一握為笑勿恤往无咎  
初與四為正應有孚者也不幸三陰同處所與者盡  
柔懦无立之輩故有不終其孚乃亂乃萃之象乃亂  
者狐疑惶惑而不能自立也乃萃者因利乘便而不

能自拔也若號於四之正應以踐有孚之約則一握  
笑之矣傳曰一握俗語一團也謂衆以為笑也然笑  
者小人之私心號者君子之公義若能不以私心奪  
公義置多口於勿恤斷然應四之剛陽而不失其正  
改過遷善无咎之道也

象曰乃亂乃萃其志亂也

象復原其志而戒之蓋謂此處把持不定則无如羣  
陰何矣若陡然立起志那有此事傳曰其心志為同

類所惑亂故乃萃於羣陰也不能固其守則為小人  
所惑亂而失其正矣格言也

六二引吉无咎孚乃利用禴

傳曰初陰柔又非中正恐不能終其孚故因其才而  
為之戒二雖陰柔而得中正故雖戒而微辭凡爻之  
辭闕得失二端者為法為戒亦各隨其才而設也此  
義亦須曉的傳以引為牽引之引曰人之交相求則  
合相待則離二與五為正應當萃者也而相遠又在

羣陰之間必相牽引則失其萃矣此理甚好余向作  
援引之引蓋二與五為正應因雜二陰之間未能卓  
有樹立故必援引之有君臣道合之慶吉而无咎也  
如登高者氣易竭力易盡稍提攜之則一往而前矣  
二之柔順中正孚於五之剛健中正同心一德者也  
相信以心不以迹相交以質不以文猶簡薄之物可  
以交於神明故曰孚乃利用禴禴夏祭專尚聲與二  
簋可用享之意同如此亦說的去然不如傳婉切懇

至又推的開傳曰孚信之在中誠之謂也禴祭之簡薄者也菲薄而祭不尚備物直以誠意交于神明也孚乃者謂有其孚則可不用文飾專以至誠交於上也以禴言者謂薦其誠而已上下相聚而尚飾焉是未誠也蓋其中實者不假飾於外用禴之義也孚信者萃之本也不獨君臣之聚凡天下之聚在誠而已本義只就祭說故雖云伊川說好而无取也

象曰引吉无咎中未變也



中正而柔一為二陰所變易雖引之其能前乎中未  
變者柔而能守其中正之本體故无有孚不終之號  
也或曰二既有中正之德而象云未變辭若不足何  
也曰羣陰類處乃其類聚方萃之時居其間能自守  
不變遠須正應剛立者能之二陰柔之才以其有中  
正之德可覲其未至於變耳故象含其意以存戒也  
須此一難爻義始盡

六三萃如嗟如无攸利往无咎小吝

三陰柔不中正四居其上欲與之萃而非正應二處  
其下欲與之萃而二應五萃如者徒有嗟如而已上  
下莫之與何利之有若往而應上當以同類相憐不  
復如二與四之見拒矣不得於此而得之於彼无咎  
之道也傳曰三與上雖非陰陽正應然萃之時以類  
相從皆以柔居二體之上又皆无與居相應之地上  
復處說順之極故得其萃而无咎也易道變動無常  
在人識之此義極盡且雖非正應句有斟酌本義云

當近捨不正之強援而遠結正應之窮交理雖精而正應二字未的故胡氏曰恐誤是也小吝者始棄其應而不往必待二四不相容乃反而求之也能无愧乎人情攀援勢利輒遭攢斥之辱及其窮无所歸然後商賔賤之交縱使憐而收之必有慚惡不自安者矣

象曰往无咎上巽也

傳曰上居柔說之極三往而无咎者上六巽順而受

之也本義往從於上一句是解爻未解象故全無巽義蒙引以為此說長於所謂上能巽受之者吾不知之矣

九四大吉无咎

九四以陽居陰非正上比五而得君之萃則擬於擅權下比羣陰而得民之萃則疑於樹黨故必大吉而後无咎也傳曰大為周遍之義无所不周然後為大无所不正則為大吉夫上下之聚固有不繇正道而

得者非理枉道而得君者自古多矣非理枉道而得民者蓋亦有焉如齊之陳恒魯之季氏是也然得為大吉乎得為无咎乎反言之其義始明矣

象曰大吉无咎位不當也

大吉无咎何以云位不當也位不當則所為未必能盡善故戒之戒之實勉之也

九五萃有位无咎匪孚元永貞悔亡

五以陽剛居尊位為萃之主萃有位何咎之有朱子

云有位而无德則雖萃而不能使人信故人有不信  
當修其元永貞之位而後悔亡也此理固是傳獨兼  
德位說曰王者有位有德中正无過咎而天下尚有  
未信服歸附者在修德以來之如苗民逆命帝乃誕  
敷文德舜德非不至也盖有遠近昏明之異故其歸  
有先後既有未歸則當修德也所謂德元永貞之道  
也如此說猶有至理又曰元首也長也為君德首出  
庶物君長羣生有尊大之義焉有主統之義焉而又

恒永貞固則通於神明光於四海无思不服而其悔  
亡矣何等透徹

象曰萃有位志未光也

象專舉爻上句傳以尚有匪孚補之為志未光張本  
也志未光則悔悔必元永貞而後亡是象傳一句統  
解爻辭也盖王者以萬類同歸為志不曰人之志未  
能孚於我而曰我之志未能光於人亦教人以反躬  
責已之道也

上六齊咨涕洟无咎

傳以上為陰柔之小人曲盡情狀本義云處萃之終陰柔无位求萃不得憂戚如是而後可以无咎也本義較勝蓋上六居說之極說極生悲固理之常然說極而能悲則知危知懼所謂善補過者故宜无咎且三居順體之上以嗟而无咎上居說體之上以齊咨涕洟而无咎其理正同項氏曰齊咨无咎之歎涕洟无澤之流甚切卦義



象曰齊咨涕洟未安上也

未安上者居卦之上未敢晏然自安故有悲傷難堪之象設心如是未有久而不萃者也傳曰君子慎其所處非義不居不韋而有危困則泰然自安不以累其心小人居不擇安常履非據及其窮迫則隕獲躁撓甚至涕洟為可羞也未者非據之辭猶俗云未便也未便能安於其上也陰而居上孤處无與既非其據豈能安乎此與本義全別然可為困窮之戒



巽下  
坤上

升元亨用見大人勿恤南征吉

為卦下巽上坤巽為木下一陰象根上二陽象幹自  
根達幹自小而大自卑而高也大象所謂積小以高  
大也坤三陰在上順受二陽之升故有亨通之理以  
其自根發達起來故曰元亨用見大人指九二陽為  
大二人位二有剛中之德而六五應之用見者六五  
用柔中之德以見也勿恤南征吉俱指九二二五志

同道合一見如故勿恤不憂其不遇也南征程朱俱云前進也潘夢旂曰向陽之方極是巽居東南坤居西南柔本三而升為四以離體升也萬物相見於離故南征吉

象曰柔以時升

傳曰柔升謂坤上行也巽既體卑而就下坤乃順時而上升以時謂時當升也本義曰升自解來柔進居四李隆山曰陰陽二氣迭為升降反萃而升是二陽

降居下三陰反居上故曰柔以時升三說俱有理

巽而順剛中而應是以大亨

巽而順以卦體言內巽而外順也剛中而應以卦德言二有剛中之德而五應之也如此則得其可升之時矣是以大亨也卦主坤言故曰元彖主剛中言故曰大

用見大人勿恤有慶也南征吉志行也

用見大人勿恤君明臣良相得益章有慶也傳曰凡

升之道必繇大人升於位則繇王公升於道必繇聖賢此義更大亦須知之南征則遂得其升而行其志是以吉也

謹按升者上進之象也巽木在地中生而不已由萌芽而甲拆而條枚而森茂參天升之義也伏處之賢出而為朝家樑棟亦升也所謂用見大人勿恤也觀國之光利用賓於王所謂南征吉也伏羲卦圖乾南坤北巽木由地而生出乎坤則入乎乾南征之象也初六一爻為成卦之主乃巽木之根根深葉茂欣欣向榮柔以時升也二三陽剛木之體也外卦三陰不唯无以滯其生意且有以培其生機故剛中而應是以大亨也應工師之求勝巨室之任故曰有慶而志行也象曰地中生木升君子以順德積小以高大坤

順也故曰順德順德者敬以直內義以方外是也積小以高大巽為高故也六爻之義皆於卦之內外兩體及上下中爻之象求之思過半矣

象曰地中生木升君子以順德積小以高大

蒙引云地中生木不可說成地上生木蓋地中生木者取巽居於坤之下而言如木仗生意於地之中而後發達於地之上所謂其根深者其末茂也極好君子觀其象以自升升須是要順逆則退矣本義依王肅本作慎德未是順德坤地象積小以高大巽木象

如何易的吾心之德原與天地萬物同體只因物欲  
錮蔽便自家卑小了積小者敬小慎微也昭烈云勿  
以善小而不為繫辭云善不積不足以成名自一念  
之小合天理積而至於念念皆合天理則高大矣自  
一事之小合天理積而至於事事皆合天理則高大  
矣天理日升人欲日降反觀心德依然與天地萬物  
同體何高大如之傳曰學業之充實道德之崇高皆  
繇積累而至積小所以成高大升之義也格言可破

頓悟之說

初六允升大吉

初以一陰為巽之主上无正應非能升者也幸比九二剛中之德信而任之附以同升則其吉大矣允者心肯意肯誠信而服從也

象曰允升大吉上合志也

二居初之上故曰上合志者一德同心以慰生平至願也歐陽永叔之於韓魏公類此



九二孚乃利用禴无咎

二有剛中之德誠信以孚於五五孚中亦交孚焉如是乃可脫略繁縟如祭者之薄其物以格神也至誠相與簡樸篤至何咎之有所謂南征吉正謂此也乃字宜玩曰孚乃利用禴若未孚而用則不利矣

象曰九二之孚有喜也

象復進一步說言二孚於五非特為臣之道无咎而已剛柔相濟澤及天下且有喜也傳曰凡象言有慶

者如是則有福履及於物也言有喜者事既善而又  
有可喜也如大畜童牛之牯元吉象云有喜盖牯於  
童則易又免強制之難是有可喜也

九三升虛邑

三一升則為坤矣坤為邑陰虛故曰虛邑以陽剛之  
才居正而體又巽故有此象所謂如入无人之境也

象曰升虛邑无所疑也

一往直前无所阻礙也

六四王用亨于岐山吉无咎

本義作亨謂登祭於山之象只是要就占說傳作亨  
曰昔者文王之居岐山之下上順天子而欲致之有  
道下順天下之賢而使之升進已則柔順謙恭不出  
其位至德如此周之王業如是而亨也四能如是則  
亨而吉且无咎矣此說極有理又曰四之才固自善  
矣復有无咎之辭何也曰四之才雖善而其位當戒  
也居近君之位任在升之時不可復升升則凶咎可知

故云如文王則吉而无咎也然處大臣之位不得无  
事於升當上升其君之道下升天下之賢已則止其  
分焉分雖當止而德則當升也道則當亨也盡斯道  
者其惟文王乎此轉尤為曲盡或以王為文王以亨  
為享以亨於岐山為克謙侯度惟祭境内之山川終  
不敢越分而修禋祀亦通

象曰王用享于岐山順事也

以柔居柔而坤體順之至也文王三分天下有其二

以服事殷正是這個樣子周公引來作証而孔子以順事釋之殆欲其師文王乎傳曰上順乎上下順乎下已順處其義故云順事也

### 六五貞吉升階

傳曰五以下有剛中之應故能居尊位而吉然質本陰柔必守貞固乃得其吉也若不能貞固則信賢不篤任賢不終安能吉也按程朱俱以升階為五傳曰階所繇而升也任剛中之賢輔之而升猶登進自階

言有繇而易也指言九二正應又從九二推開說曰  
在下之賢皆用升之階也能用賢則彙升矣此理固  
不可易本義特約言之耳或曰指九二言坤為土三  
偶畫如之自下而高有階象二之升五如升階然然  
此人君升進賢臣與共天下之象也此理亦好余向  
來有說云人主倚任賢人猶升之有階也元階而憑  
一手一足之力其能升乎九二以剛中應五五之階  
五之所以吉也使非信篤任專正固不貳雖有階吾

得而升諸故必貞而後能吉貞吉而後能升階也此亦明曉姑存之

象曰貞吉升階大得志也

五以二為階而有所憑依以往二為五之階而有所扶翼以進上下相資躋一世於昇平之域五之志乃大得也或曰志大得指九二非也

上六冥升利于不息之貞

上以陰處升之極貿貿於迷途而不知止者也故曰

冥升冥升猶言冥行也若以貿貿於迷途者還而致  
致于正路則不息之貞也所謂惟狂克念作聖矣傳  
曰君子于貞正之德終日乾乾自強不息如上六不  
已之心用之于此則利也以小人貪求無已之心移  
于進德則何善如之其義甚精

象曰冥升在上消不富也

處極上而不知止其心將以求益也孰知陰本虛日  
就消亡豈有加益之理乎傳曰升既極則有退而无



進也惟從事于不息之貞則日息而富矣



兌下  
兌上

困亨貞大人吉无咎有言不信

本義云困者窮而不能自振之意兌在上為澤坎在下為水澤在水上則其澤竭矣此其所以為困也內坎外兌是處險而能說也故曰困亨傳所謂以卦才言是也困而能亨則貞矣貞非小人所能也故于大人有專屬焉大人者不以貧賤憂慮易志不以艱危

險阻動心是以吉而無咎也時方不利宜緘默以自  
全若嚶嚶然求白于人其誰信之尤為口故有尚口  
之戒

彖曰困剛揜也

以二體合言之坎剛為兇柔所掩以二體分言之下  
一剛為二柔所掩上二剛為一柔所掩卦以困名謂  
此也

險以說困而不失其所亨其惟君子乎貞大人吉以剛

中也有言不信尚口乃窮也

剛陽君子為陰柔小人所掩蔽君子之道用窒之時也陷于險中是人情所憂虞難堪者也而以說體處之怡然自得險以說也險以說則時困而道亨身困而心亨知命樂天困而不失其所亨也非君子能之乎傳曰君子大人通稱或曰所字斷句即艮止其所之所不如連亨字讀為是貞所以為大人之吉者以其有剛中之德也謂九二九五也充上六有言而不

信于坎坎兇相失尚口乃窮也以口舌免困祇益之  
困耳何如反躬修德之為愈也文王囚羑里而演易  
孔子厄陳蔡而弦歌周公居東土而赤舄几几皆困  
而不失其所亨者也

象曰澤无水困君子以致命遂志

澤在水下則有水水在澤下則无水本義曰水下漏  
則澤上枯困之象也君子觀其象而命可困志不可  
困以致命遂志傳云推致其命本義云致命猶言授

命言持以與人而不之有也其義更確蓋時勢既不  
可為則命與志無兩全之理命全而志喪志全而命  
喪致以遂之即舍生取義殺身成仁也凡人平居矢  
志時鮮不願為忠臣義士者及禍患切身便貪生怖  
死把生平志願都灰墮了如范質王溥輩可勝歎哉  
若是社稷念重身家念輕君父念重妻子念輕臨時  
須辦得一死不至搖尾乞憐覩顏人世矣儒行云儒  
有劫之以衆阻之以兵見死不更其守又曰可殺也

而不可辱也此致命遂志之謂也文天祥方孝孺其表表者與

初六臀困于株木入于幽谷三歲不覿

初以陰柔處困之下其才既不足以自濟其困四為正應掩于上六自治不暇其力又不足以濟初六之困如木无枝葉失所庇蔭居其下則不安也故曰臀困于株木臀即臀无膚之臀在坎下幽谷之象故曰入于幽谷三歲之久不見正應則是上下交困也

象曰入于幽谷幽不明也

不明故无所覿也猶云黑洞洞底如何出的去明則日進于崇高不明則日入于卑暗理固然也

九二困于酒食朱紱方來利用享祀征凶无咎

本義云困于酒食厭飫苦惱之意謂醉飽過宜也郭氏云困于家无飲食宴樂之奉二說迥異然不如傳意為長需之九五需于酒食困之九二困于酒食皆以在坎中也需就養人說困二亦宜就養人說傳曰

君子之所欲澤天下之民濟天下之困也二未得遂其欲施其惠故為困于酒食也先代亂離之世以世有醉人為瑞豈非困于酒食之一驗與二以剛中之德困于下正已而無求者也上有九五剛中之君同德相應必能造廬而請故曰朱紱方來朱紱王者之服蔽膝也服蔽膝而來便有造膝意方來者謂其來方自此始也利用享祀傳所謂以至誠通神明是也未能事人焉能事鬼欲以事人者事神也利用享祀



欲以事神者事人也潔誠齋一莫過于享祀故九二  
利用之傳曰自昔賢哲困于幽遠而德卒升聞道卒  
為用者唯自守至誠而已征凶無咎傳云無所歸咎  
也本義云若征行則非其時而于義為无咎也反覆  
求之既云凶矣何以无咎既云行非其時則非義矣  
又何以于義无咎畢竟未安主傳為是征凶者君不  
來而自往无媒是以凶也將誰咎乎當困之時慮其  
以急于濟困之心而不遑自愛故戒之也

謹按困之二五兩爻說者率多異同竊意孔明之高卧南陽淡泊明志困于酒食也不求聞達而昭烈三顧于草廬中朱紱方來也言聽計從有魚水之洽利用享祀也鞠躬盡瘁食少而事多征凶也然而命已致矣志已遂矣又何咎之有哉方昭烈之在江夏也前有孫權後有曹操則也孔明如吳營而不返困于赤紱也徐自南屏而歸乃徐有說也卒得荊州以為基業利用祭祀也又按爻辭所有皆卦中自具之象故困之九二即需之九五所以皆取酒食為象但彼以剛健不陷而吉此以剛拊而困是其義自一也尤為口舌為頰為毀折五為上六所拊剿之象也中爻二至四為離為戈兵四為三所拊在五之下剛之象也坎為赤中爻五至三為巽為繩赤紱朱紱之象也坎為豕亢為羊離為牛牲牢畢具享祀祭祀之象也以此類推大易之取象无俟小求矣

象曰困于酒食中有慶也

象舉爻首句以該下故曰中有慶也五剛中而折節  
下賢二之慶也二剛中而推誠事主五之慶也上下  
交盡其道困于酒食者行當需于酒食矣是以有慶  
六三困于石據于蒺藜入于其宮不見其妻凶

三陰柔不中正上承四不能降心以相從而力犯之  
困于石也石堅不可勝之物而與為難可乎下乘二  
不能屈體以相附而直據之據于蒺藜也蒺藜刺不

可近之物而憑其上可乎進退兩窮反而求之无容  
身之地矣三坎體男也上兌體女也故上者三之妻  
然非正應又為二剛所隔何可見也故有入其宮不  
見其妻之象宮謂三也詩所謂宛其死矣他人入室  
者凶可知也本義云繫辭備矣傳釋之尤為明盡  
象曰據于蒺藜乘剛也入于其宮不見其妻不祥也

二剛也三乘其上如藉刺然故曰困于蒺藜也不祥  
者犯上凌下不善之積有餘殃也

九四來徐徐困于金車吝有終

來徐徐謂四也蒙引以為初誤矣易自下而上曰往  
自上而下曰來故知其為四也四與初為正應思有  
以拯其困而未能初比于二疑其遂有之矣故遲回  
觀望而不敢直前二阻之也二坎為輿有車象剛而  
堅強有金車象故曰困于金車四困二而失初誠為  
可羞但初之應四正也比二非正也久則去其不正  
者以歸于正故有終也傳曰寒士之妻弱國之臣各

安其正而已苟擇勢而從則惡之大者不容于世矣  
讀至此使我毛骨俱悚

象曰來徐徐志在下也雖不當位有與也

在下者初志在下志在于拯初也志在拯初而隔于  
二故徐徐其來也以剛居柔為不當位然正應在初  
有與也有與則有終矣

九五剝則困于赤紱乃徐有說利用祭祀

傳云上下皆掩于陰以卦之全體言也本義云上為

陰揜下則乘剛此專指五言蔽于一陰則傷於上截  
鼻之象下逼于一剛則傷于下則足之象困于赤紱  
謂二也二以五為朱紱五以二為赤紱君臣異服也  
五與二同德而不相應不得與于冠裳之會故曰困  
于赤紱時方不利急之則重困緩之則亨困故曰乃  
徐有說本義云剛中而說體故能遲久而有說也約  
言之而其義盡矣傳曰五雖在困而有剛中之德下  
有九二剛中之賢道同德合徐必相應而來共濟天

下之困是始困而徐有喜說也博言之而其義益暢矣利用祭祀與利用享祀同一至誠感格之意但有君臣之分享祀人臣所以祭宗廟也故屬二祭祀天子所以禮百神也故屬五傳曰祭天神祀地祇享人鬼其義備矣

象曰剿則志未得也乃徐有說以中直也利用祭祀受福也

上下見傷未得遂其濟困之志也以中直之道得中



直之賢庶幾喜起之風矣傳曰不曰中正與二合者  
云直乃宜也直比正義差緩祭則受福在鬼神固然  
而況于人乎又曰盡其誠意如祭祀然以求天下之  
賢則能亨天下之困而享受其福慶也明且備矣

上六困于葛藟于臲臲曰動悔有悔征吉

上以陰柔處困極之地纏綿而不解高危而不安故  
有困于葛藟于臲臲之象困極則必變矣曰者自怨  
自艾之辭若曰每做事輒不強人意輒覺愧歉難堪

却是好念頭凡人履錯蹈愆而宴然不知其非則難與言矣知其動輒得悔是有悔也有悔則必改過改過則必遷善以是而征其吉可知二在困之中是宜安困故曰征凶上在困之終是宜出困故曰征吉傳曰困與屯之上皆以无應居卦終屯則泣血漣如困則有悔征吉屯險極而困說體故也以說順進可以離乎困也

象曰困于葛藟未當也動悔有悔吉行也

葛藟之困是他解脫不來割斷不去故曰未當言自  
已處置未善不管他人事便見悔意動悔有悔悔其  
所行則不行其所悔故行而吉也行謂去而出于困  
也



巽下  
坎上

井改邑不改井无喪无得往來井井汔至亦未繙井羸  
其瓶凶

卦體上坎下巽坎水也巽之象則木也巽之義則入

也朱子只取巽入之義不取木義恐巽乎水而上水  
句難解依傳木器汲水之說為是或云與羸其瓶句  
不合按鄭康成云巽木桔槔也言桔槔引瓶下入泉  
口汲水而出也如此則巽木瓶瓦之說兩得之矣自  
古建邦設都或以民利遷或以易代遷邑可改也若  
井則无遷而之他之理井不可改也或曰坎自坤變  
坤為邑故曰改邑不改井亦通汲之而不竭无喪也  
存之而不盈无得也人人給其所求往來井井也本

義云往者來者皆井其井醒甚張中溪曰下本乾體  
上本坤體剛往居五柔來居初往者得水而上來者  
求水于下往來井井也于象尤切傳曰无喪无得其  
德也常往來井井其用也周常也周也井之道也于  
理尤確繙綆也汲水索也巽為繩故為繙象水幾至  
上而未出井謂坎中畫未至坎上畫則汲未出  
井口亦與未施繙于井者同耳羸敗其瓶象二三之  
水已實在汲井之瓶而下一畫偶猶瓶底傷損而水

下漏則終不能貯水矣有喪无得徒往來而无以井  
其井濟物之功廢矣故凶胡氏曰澤无水為困命也  
澤雖无水而井則有水性也知困之義則知安命知  
井之義則知盡性易性命之書而言之明且切者莫  
困井二卦若也改邑不改井三句為井言汔至三句  
為汲者言改邑不改井井之體也性靜而定也无喪  
无得往來井井井之用也性動亦定也汔至未繙井  
而羸其瓶人之于性知之行之有未盡者其猶是乎

# 此理不可不知

謹按改邑不改井說者不一折中獨謂所在之邑井  
无異製即王道之行家不異政國不殊俗是也竊嘗  
取彖傳爻象反覆詳味追尋改字來歷蓋坎之中爻  
在九二則為困在九五則為井總一水耳一上一下  
而困與井不同所謂改邑不改井也以喻王道之行  
雖有時而通變宜民而三綱五常百代如一所損益  
可知也无喪无得則經國體野王道之可久也往來  
井井則養欲給求王道之可大也所謂井養而不窮  
也然井之澤雖可遠施而取之无具汲之無人亦不  
能成濟人利物之功故汔至以下又以汲井之事言  
之君子觀其象而以勞民勸相明于井之義也井泥  
不食舊井无禽如紀綱法度廢弛已久不可施行也  
然而尚可漑也井谷射鮒井中旁空為谷小魚往來  
如射也甕敝漏者昔子貢見老父抱甕而汲則甕亦

汲器也。敝漏則不可汲矣。言王政之弛敝實百出而  
又行之无具也。然而尚可甃也。九三滌其泥而可食  
矣。而不食者亦未繙井故也。是以求王明而受福也。  
六四甃其谷而甃去矣。其无咎者可以往來井井故  
也。九五之寒泉上六之勿幕則澤可遠施家給人足  
井養而不窮矣。此則從欲以治風動時雍之意。故元  
吉而大成也。

彖曰巽乎水而上水井井養而不窮也

巽木入于坎水之下而汲水以上故曰巽乎水而上  
水莊子所謂鑿木為機後重前輕挈水若抽者是也  
濟人利物无有窮已井養而不窮也以卦象釋卦名



義也而卦之德亦在其中矣

改邑不改井乃以剛中也汔至亦未繙井未有功也羸其瓶是以凶也

剛中程朱俱指二五或專指九五為是坤之邑變為坎之井則畫在卦體之中也天下之水至冬而溫者惟井泉以其獨得天一之真性也二句已該无喪无得往來井井之義故彖傳不復出汔至亦未繙井是不如行潦之酌可以濯漑濯饒也何功之有羸其瓶

則不惟不得水併其瓶而喪之不亦凶乎傳曰五穀不熟不如萑稗掘井九仞而不及泉猶為棄井本義云又當敬勉不可幾成而敗其勉學者之意深矣然則始終成敗之際可勿慎與

象曰木上有水井君子以勞民勸相

木承水而上以養人于不窮井之義也君子觀其象而布德于民勞即愛之能无勞乎之勞如水以濟物為功使非往來井井水能自上而給人之養乎勞民

之意正如此勸者教之誨之誘掖之以勉其進也相者輔之翼之左右之以振其德也皆所以勞民也若曰勞徠而勸之相助則相為虛字須添實字始得非也胡氏曰井以喻性勞民勸相養其生併養其性也初六井泥不食舊井无禽

初以陰居井之下泥之象也泥則汚而不可食矣凡水之可食者禽鳥亦資其潤人既不井其井即禽鳥亦莫往莫來矣故曰舊井无禽

象曰井泥不食下也舊井无禽時舍也

下者處乎下而水不能上也時舍者為時所棄置而莫之用也學者才柔志卑溺于下流于世无涓滴之益者抑亦可以自愧矣

九二井谷射鮒甕敝漏

二陽剛之才爻辭甚不好何也井以下而能上為義上无正應而比于下失井之義矣井之完美者无谷枯井廢井則有谷有谷則水旁出而注于鮒无所用

之矣。鮒鮒慕之。屬或曰：甕汲水器，即瓶非也。甕成水  
器與瓶異。器雖小，分井中之餘潤，亦足以利用。敝而  
滲漏，有日就枯竭而已。凶咎不待言矣。

象曰：井谷射鮒，无與也。

上无應，故曰无與。无與，則无以異乎水而上水矣。故  
井谷射鮒也。如人資質之美，才分之高，儘足以上達，  
但无誘掖之提攜之者，遂與下流為伍，馳驚于旁途，  
敗壞流溢而不知自愛其器也，可惜甚矣。

九三井渫不食為我心惻可用汲王明並受其福

三剛正處下之上其井渫矣渫即渫初之泥使皎然  
清潔也而乃不食與舊井同負此嘉美能无惻然不  
安之心乎或曰知己興嗟輿論稱屈也汲而用之井  
養不窮其如上无明王何若遇王明則受福矣傳曰  
賢才見用則已得行其道君得享其功下得被其澤  
合三者而受福之義始備

象曰井渫不食行惻也求王明受福也

爻言心惻象言行惻傳未着解本義云行道之人皆  
以為惻甚好賢者不見用則秉彝好德之良有同心  
焉故曰行惻也爻言王明象加求字焦氏云爻脫求  
字言求者三以不求求之非也炫玉求售非九三本  
色矣然則何以云求曰非三求之惻者求之也惻于  
心則思求王明以慰其心求王明正所以求福也

六四井甃无咎

四以柔居柔其才不足有為无濟物之功者也然守

正不回上承九五而效一臂之力分因應爾故曰井  
甃无咎甃者砌累其井使谷不伏于旁甃不生于下  
救敝補漏所繇與九二異矣

象曰井甃无咎修井也

象復以修釋甃言舊者修之以至于新缺者修之以  
至于全整飾戢治之謂也才力柔弱故不事頓悟事  
漸進學之以積累為功者乎九二以才勝而敗六四  
以學勝而成天分之遜美于人事也項平庵曰泥與



甃皆陰也初六不正在下故不能自修而為泥六四  
正而在上故能自修而為甃甃所以禦泥而達泉也  
有閑邪存誠之功故為修井之象王建安曰三在內  
卦滌井內以致其潔四在外卦甃井外以禦其污盖  
不滌則污不潔不甃則潔者易污此君子内外交相  
養之道也二說甚妙不可不知

九五井冽寒泉食

九五坎之中所謂改邑不改井者謂此也以陽居陽

為坎居正北分為寒甘潔而清涼口之于味也有同嗜焉故曰井冽寒泉食不言吉者三渫之四甃之上收之五中正元為坐享成功而已傳曰井以上出為成功未至于上未及用也故至上而後言元吉


象曰寒泉之食中正也

九二中矣而非正九三正矣而非中全中正之德以食于人者其惟九五乎故曰其才其德盡善盡美也上六井收勿幕有孚元吉

井與諸卦不同以最上為美先儒云收鹿盧收綯者也以木之才成水之用正與卦體合勿幕者忘其所取即往來井井之意同井其井故坎口開而勿用蔽覆也若視為一人一家之私則幕之矣此王道大公氣象與文王之圃一般有孚傳謂有常而不變也本義謂其出有源而不窮也傳更確博施而有常故本大喜之吉

象曰元吉在上大成也

井至是不滌而清不甃而完寒冽之美與天下共之  
澤被羣生矣故曰大成也李氏曰初與二在井之地  
故初泥而二谷三與四人位必盡人事故三滌而四  
甃五與上則得之天矣是以三才之位取義也其說  
甚好

  
離下  
兌上

革已日乃孚元亨利貞悔亡

上兌為水水下降而滅火下離為火火上升而涸水

相尅故相革也此本彖傳程朱之說詳矣或曰兌為金離為火火鼓鑄而金從革以火革金也于理亦通玩彖傳却无此意凡民可與樂成而難與慮始當始為改作之日鮮不疑且惑者及害除而利興然後自悔其見不及此而曉然相信也故曰已日乃孚事方始而未孚所固然也若遽為衆論所奪則終不能革矣事既已而乃孚所必然也若終為衆心所疑則非所當革矣故已日乃孚所以為革也革體內文明外

和說以乾之四德屬之四德者大通而利在正固也  
正固則无紛更移易之悔故曰悔亡傳曰革而无甚  
益猶可悔也況反害乎古人所以重改作也此名言  
也

彖曰革水火相息二女同居其志不相得曰革

本義曰以卦象釋卦名義大略與睽相似然以相違  
而為睽相息而為爭也引喻最確相息須兼滅與生  
二義傳曰物止而後有生本義曰滅息而後生息也

兌少女離中女二女同居也中少二女各有志故不相得而革也

已日乃孚革而信之文明以說大亨以正革而當其悔乃亡

已日已革之日也孚信也傳曰人心不信雖強之行不能成也先王政令人心始以為疑者有矣然其久也必信終不孚而成善治者未之有也離明也內有文明之德則大亨以正而其革也當乎天理兌說也

金史四庫全書  
卷八  
外有和說之德則大亨以正而其革也當乎人情天  
理人情各得其至當何悔之有傳曰新舊之悔皆亡  
最盡天下事有恰好的道理曰當當者時措咸宜也  
天地革而四時成湯武革命順乎天而應乎人革之時  
大矣哉

即以天地聖人言之能外是乎四時之序成功者退  
退革也天地陰陽推遷變易而春夏秋冬合著其生  
長收藏之用互革而成四時也王者之興受命于天



湯革夏正武革商正易代受命也予畏上帝不敢不正湯之順天乎撫綏萬方湯之應人乎予弗順天厥罪惟均武之順天乎綏厥士女武之應人乎天地聖人无不革者天地聖人之革无不時者時之未革天地聖人不能先時之既革天地聖人不能後革之時大矣哉革而當其可之謂時

象曰澤中有火革君子以治厯明時

澤中有火勢不兩立革之象也君子觀革之象以治

歷法而明四時之序即堯命羲和欽若昊天歷象日月星辰敬授人時之意期三百有六旬有六日歷之數也在璇璣玉衡以齊七政歷之理也治歷明時之道讀月令大畧可見蓋歷不乖其序則治求其故而定千歲之日行所无事也有兌象時不失其中則明晦朔弦望分至啓閉燦若觀火也有離象傳曰夫變易之道事之至大理之至明跡之至著莫如四時觀四時而順變革則與天地合其序矣最簡盡

初九鞶用黃牛之革

傳言變革之道有三曰時曰位曰才九以時則初也  
初宜待以位則下也下宜守以才則明而剛也剛明  
宜晦故曰鞶用黃牛之革鞶拘束也本義云鞶固也  
離為牡牛離爻本坤黃牛象黃中色牛順物以中順  
自守而不妄動則其分也革為皮與卦名雖同而義  
異傳曰不云吉凶何也曰妄動則有凶咎以中順自  
固則不革而已安得便有吉凶乎

象曰輦用黃牛不可以有為也

不可有為以時位才俱不可也在益之初曰利用大作在革之初曰不可有為學易者明乎此則知進退之道矣

六二已日乃革之征吉无咎

傳曰以六居二柔順而得中正又文明之主上有剛陽之君同德相應中正則无偏蔽文明則盡事理應上則得權勢體順則无違悖時可矣位得矣才足矣

處革之至善者也然臣道不當為革之先又必待上  
下之信故已日乃革之也如二之才德所居之地所  
逢之時足以革天下之弊新天下之治當進而上輔  
于君則吉而无咎也不進則失可為之時而有咎也  
如此說其義始備卦言已日乃孚已革之日乃孚也  
爻言已日乃革已孚之日乃革也或曰有君臣之分  
亦是

象曰已日革之行有嘉也

行有嘉即所謂征吉也謂煥然與天下更始行有嘉美之功也又何咎徐氏曰凡卦中言嘉者皆二與五應如隨之孚于嘉遯之嘉遯是也此義不可不知

九三征凶貞厲革言三就有孚

以剛陽為下之上又居離之上而不得中躁動于革者也在下而躁于變革以是而行則有凶也然居下之上事苟當革豈可不為也在乎守貞正而懷危懼也貞厲二字平看諸家之說皆與征凶一例看言征

則凶而貞則厲也唯革言三就則征不凶貞不厲而有孚矣其理俱通革言謂以改革之論相籌度也諮詢衆說參稽公論至再至三而僉同焉卦所謂乃孚者三有之矣有孚者至誠之道見信于中外上下也或曰三上正應上兌為口言象三至上歷三爻三就象亦通

象曰革言三就又何之矣

傳曰又何之猶俗語更何往也本義曰言已審俱極

簡盡余謂又何之言革而當无庸轉圖再計也

九四悔亡有孚改命吉

傳于九四極贊之至數層蓋離兌交代正改命之時  
剛柔罔偏正改命之才而又近承九五當改命之任  
故美善與他卦九四不同悔亡彖所謂革而當其悔  
乃亡也有孚改命吉彖所謂湯武革命順乎天而應  
乎人也傳曰四非中正而至善何也曰惟其處柔也  
故剛而不過近而不逼順承中正之君乃中正之人



也易之取義无常也隨時而已此義須知

象曰改命之吉信志也

傳曰改命而吉以上下信其志也誠既至則上下信  
矣革之道以上下之信為本不當不孚則不信當而  
不信猶不可信也況不當乎三代而後漢霍光廢昏  
立明庶幾改命之吉矣以其匡扶社稷之志有足信  
故也

九五大人虎變未占有孚

九五以陽剛之才中正之德居尊位大人也大人德威惟畏故象虎虎變傳所謂遇變化事理明著如虎之文采本義謂希革而毛毳也在大人則自新新民之極順天應人之時也皆有至理可參傳又曰變者事物之變曰虎何也曰大人變之乃大人之變也上下但易一字便成至妙之理按乾九五言龍堯舜其猶龍乎革九五言虎湯武其猶虎乎書曰朕夢協朕卜襲于休祥詩曰卜云其吉終焉允臧占而孚即數

以推理也大人之革至當而人信之故不須此即理以奪數也易之言進乎詩書矣

象曰大人虎變其文炳也

道德功業煥為文章有光輝發越之盛故曰其文炳也天下之孚不待言矣

上六君子豹變小人革面征凶居貞吉

上處革之中革道成矣君子斐然成章故曰豹變小人屈已聽命故曰革面君子小人以德言非以位言

也傳曰以堯舜為君以聖繼聖百有餘年天下被化可謂深且久矣而有苗有象其來格蒸乂蓋亦革面而已引喻最確又曰小人既革其外革道可以為成也苟更從而深治之則為己甚己甚非道也故至革之終而又征則凶也征凶革承小人革面句說又曰革至于極而不守以貞則所革隨復變矣天下之事始則患其難革已革則患乎不能守也故革之終戒以居貞則吉也自古招亡納叛不旋踵而背去者多

矣皆繇不能居貞故也又曰人性本善有不可革者何也曰語其性則皆善也語其才則有下愚之不移所謂下愚有二焉自暴自棄也人苟以善自治則无不可移者雖昏愚之至皆可漸磨而進也唯自暴者拒之以不信自棄者絕之以不為雖聖人與居不能化而入也仲尼之所謂下愚也然天下自棄自暴者非必皆昏愚也往往強戾而才力有過人者商辛是也聖人以其自絕于善謂之下愚然考其歸則誠愚

也既曰下愚其能革面何也曰心雖絕于善道其畏  
危而寡罪則與人同也唯其有與人同所以知其非  
性之罪也革面二字如此分疏其義始明

象曰君子豹變其文蔚也小人革面順以從君也

虎豹同文但虎之文疎而著故曰炳豹之文密而理  
故曰蔚大小不同也小人革面順而不復逆從而不  
敢違束于法也本義云上六之才不足以有行也一  
似革面未為上治傳曰小人勉而假善君子所容也

更往而治之則凶矣似上治只是革而竊意革道既成豈宜復留餘地傳義皆未盡也君子豹變中庸所謂明著動變也是至誠而化的學問小人革面語所謂民可使由之不可使知之也奉公守法不必更論其所以然也如此看則征凶兼承君子小人說君子之文至豹變无以加若更有所往則過飾矣小人之道至順從无以加若更有所往則過刻矣惟自守其固然之正道則上而彬彬有大雅之士下而皞皞无

梗化之民革道成矣故吉也



巽下  
離上

鼎元吉亨

六十四卦惟大有與鼎直稱元亨而不別贅一辭蓋  
鼎者有天下之重器故其才可以致元亨也元亨者  
體无不備用无不周大善而亨通也吉字義讀彖傳  
自明矣

彖曰鼎象也以木巽火亨飪也聖人亨以享上帝而大



亨以養聖賢

先王制器尚象鼎器也故以象釋之分二體而言上離中虛下巽有足以承之鼎之象也合全體而言下植為足中實為腹受物在中之象對峙于上者耳也橫亘乎上者鉉也鼎之象也傳曰有象而後有器卦復用器而為義也巽木離火相資為用可以成亨飪之功利濟羣生也然豈徒口腹之奉哉聖人報本反始則有亨帝之禮郊特牲不敢用褻味而貴多品故

帝之享但曰亨養賢致民則有享賢之禮大饗尚服脩而已矣大饗君三重席而酢焉多儀備物故聖賢之養則曰大亨

巽而耳目聰明柔進而上行得中而應乎剛是以元亨下體巽者內順于理也上體離離為目中虛為耳外而耳目聰明也此以其象言也傳云凡離在上者皆云柔進上行柔在下之物乃居尊位進而上行也本義云卦自巽來陰進居五則以其變言也五柔居

上卦之中而下應九二得中而應乎剛也此以其德  
言也有才有德以居尊位而又下應剛中之賢是以  
元亨或曰大吉无不利爻屬上九而彖傳以五為元  
亨者五為卦主舉鼎者雖上九之鉉而非有六五之  
黃耳則鉉無所施故以元亨贊焉

象曰木上有火鼎君子以正位凝命

木上有火為爨則木上有水為汲即鼎象益知井象  
矣水火不濟則鼎之用不凝位不正則命之理不凝

其義一也傳云端正其居處安重其命令朱子以為未然此言人君臨朝須莊重如那鼎相似安在這裏不動然後可以凝住那天之命所謂協于上下以承天休也說得極好但大象如施命誥四方之類則必稱后若如晦翁說當不稱君子矣竊意位即素其位順在位不出其位之位正者正其所居之位也君子所處必正其小至于席不正不坐毋跛毋倚傳義精矣命即維天之命永言配命顧諟明命之命凝即至

道不凝之凝翕而聚之也謂正位以凝其所賦于天之理也如此說當與朱義併存

謹按此節當以朱義為是

初六鼎顛趾利出否得妾以其子无咎

初居鼎下有趾象上應四則趾向上口向下有顛象方是時鼎未有實而舊有否惡之積焉宜有以易之趾顛則鼎覆鼎覆則否出否出則利矣六陰而卑妾象初剛六柔得妾象傳以子為主謂良妾能輔助其

主也本義直作子謂得妾而因得其子亦繇是也爻  
本因一象又得一象故繇是二字極精至于因敗以  
為功因賤以致貴二語尤確宜理會胡氏曰爻不正  
故稱妾下巽伏震長子之象也主器有人无咎之道  
也此又暢朱子之說矣

象曰鼎顛趾未悖也利出否以從貴也

趾顛鼎覆悖道也象曰未悖已引起利出否義矣利  
出否去故而納新瀉惡而受美象曰從貴又結出應

四義矣四近君居大臣之位故貴也然春秋母以子貴之義固在其中聖人解經之妙如此

九二鼎有實我仇有疾不我能即吉

二以剛居中鼎有實之象然上應六五而密比初陰陰從陽者必利其實而即之我九二自我也仇謂初傳云仇對也陰陽相對之物本義直作怨仇謂陰陽相求而非正則相陷于惡而為仇徐氏曰怨耦曰仇不善之匹也其義益明矣顛趾也顛趾則難前欲即

我而不能然亦二之剛中自守有以過其密比之勢也吉可知矣

象曰鼎有實慎所之也我仇有疾終无尤也

傳曰鼎有實乃人之有才業也若不自貴重將玷其實而喪所有矣慎所之愛吾鼎也謂不睨于初而上從六五之正應也我仇有疾兼下句說初有疾而我即則有尤不我能即何過尤之有

九三鼎耳革其行塞雉膏不食方雨虧悔終吉



六五鼎耳也為鼎之主三越五應上是革去其耳无所恃以為舉移之具矣凡物皆行以足獨鼎之舉措在耳故行以耳耳既革其能行乎故曰塞傳曰膏甘美之物象祿位雉指五也有文明之德故謂之雉三有才用而不得六五之祿位是不得雉膏食之也本義云承上卦文明之腴有雉膏之美而不得以為人之食本義猶醒三懷才抱德而不見售猶雉膏在鼎而不見食也與井渫不食意同雖然三與五非應而

同功剛柔有相濟之理方且陰陽和暢而為雨也雨  
則行之塞者可通雉膏之不食者見食矣方雨句虧  
悔終吉句言始有不足之悔而終有相遇之吉也傳  
曰三雖不中以巽體故无過剛之失若過剛則豈能  
終吉

象曰鼎耳革失其義也

語曰君臣之義如之何其廢之孟子曰義之于君臣  
也鼎耳革君臣之義廢矣故曰失其義也蒙引不主

不仕无義說曰越五應上自失其義无所取裁也固自有理

九四鼎折足覆公餗其形渥凶

傳曰四大臣之位任天下之事者也天下之事豈一人所能獨任必當求天下之賢智與之叶力得其人則天下之治可不勞而致也用非其人則敗國家之事貽天下之患四下應于初初陰柔小人不可用者也而四用之其不勝任而敗事猶鼎之折足也又按

初顛趾而四應之故為鼎折足之象足折則所謂享上帝養聖賢之實覆矣故曰覆公餗餗糝也八珍之膳鼎之實也三為公位公餗公所食之餗也形渥傳作赧汗言可羞愧之甚也固是本義從晁氏之說作形渥鄭註以為夷三族謬矣豈周公時已制始皇之刑耶蒙引辨之極是舊以為沾濡貌朱子語錄亦引澆濕渾身之說則渥即詩既優既渥之渥謂鼎實覆溢也當以此說為的外誤其國內污其身凶可知也

象曰覆公餗信如何也

任用匪人敗乃公事上无以信君下无以信民而內亦无以自信盟心之謂何故曰信如何也

六五鼎黃耳金鉉利貞

五居上體之中受鉉以舉鼎者也故為耳坤正色本黃離得坤中畫故為黃耳金鉉程朱俱指九二以玉鉉屬上故以金鉉屬二但二在耳之下恐未能勝厥任也指上九為是訂詁云鼎豈有二鉉哉玉不可以

金鑊以金鑊而飾以玉也得之矣在五以已之柔視  
上之剛則為金鑊在上九自視畫剛位柔則為玉鑊  
各有取爾也五質陰柔恐不勝堅剛之鑊故又有正  
固之戒

象曰鼎黃耳中以為實也

中以為實者五以九二之實為實也二五正應二有  
實而五舉之正彖所謂得中而應乎剛也

上九鼎玉鑊大吉无不利

一陽橫亘於鼎耳之上為鉉象陽而居陰有溫潤以  
栗之德為玉鉉象處鼎之終巽木離火畢達其用鼎  
于是乎告成功矣是以大吉无不利

象曰玉鉉在上剛柔節也

鼎之亨飪以剛柔適中為度玉鉉在上佐黃耳之鼎  
左提右挈而无不宜故曰剛柔節也書所謂以鹽梅  
作和羹變理陰陽者殆其人與

易酌卷八